

दिनांक 14.01.2025

समय: 18.45 बजे

- प्रधानमंत्री नरेन्द्र मोदी, मिशन मौसम की सुरुआत करी— वे कह्या ओ मिशन देश ने मौसम रा हर हालात सू निपटबा मांय सक्षम अर क्लाइमेट –स्मार्ट बणावा की भारत की प्रतिबद्धता की प्रतीक है।
- सशस्त्र सेना पूर्व सैनिक दिवस माथे प्रदेशभर मांय आज केई कार्यक्रम राख्या गया—राज्यपाल पैली रा सैनिकां अर वीरांगनावां की सम्मान कर्या।
- मकर संक्रांति की पर्व प्रदेशभर मांय पारम्परिक उछाव रे सागे मनायो जा रह्यो है—सुंवारे सूं ही दान—पुण्य की दौर जारी।
- राज्य मांय तेज सर्दी की असर — भरतपुर, कोटा अजमेर अर बीकानेर संभागां मांय काल कठे—कठे हल्कां सूं मध्यम दर्जा की मेह बरस सके है।

000

प्रधानमंत्री नरेन्द्र मोदी देश ने मौसम रा हर हालाता सूं निपटबा मांय सक्षम अर क्लाइमेट स्मार्ट राष्ट्र बणावा खातर मिशन मौसम की आज सुरुआत करी। ओ कार्यक्रम नई दिल्ली रा भारत मंडपम मांय भारतीय मौसम विभाग रा 150 वां थापना दिवस रे मौके राख्यो गयो हो। ई मौके प्रधानमंत्री कह्या के मिशन मौसम एक स्थायी अर भविष्य खातर तैयार राष्ट्र रा निर्माण की दिशा मांय भारत की प्रतिबद्धता की प्रमाण है।

.....

प्रधानमंत्री मेहकमां की डेढ सौ बरस की यात्रा की सराहवणा करता थकां ई ने देश मांय आधुनिक विज्ञान अर प्रौद्योगिकी की एक गौरवशाली अध्याय बतायो।

.....

प्रधानमंत्री कह्या के 'सभी के लिए पूर्व चेतावनी' पहल देश की 90 फीसदी सूं बत्ती आबादी ने सूचना देवे है। वे कह्या के कोई भी व्यक्ति आवता दस दिनां की मौसम संबंधी जानकारी किणी भी टेम हासिल कर सके है। श्री मोदी कह्या के भारत की मौसम संबंधी प्रगति देश की आपदा प्रबंधन क्षमता ने मजबूत करे है। वे मौसम महकमां रे डेढ सौ वर्ष पूरा होबा माथे एक स्मारक सिक्का भी जारी कर्या। प्रधानमंत्री आई.एम.डी विज्ञान-2047 रा दस्तावेज भी जारी कर्या।

000

प्रधानमंत्री नरेन्द्र मोदी रे साथै परीक्षा पे चर्चा मांय भाग लेवण सारू ई बरस रिकॉर्ड तोड़, सवा तीन करोड़ छात्रावां, अभिभावकां अर शिक्षकां आप की पंजीकरण करायो है। पंजीकरण करावण वाळां मांय विदेशी छात्र ई शामिल हैं, जिण सूं इण की दुनिया भर मांय पहचान और बंध गयी है। परीक्षा पे चर्चा की 8वीं कड़ी स्कूल स्तर माथे राखी जावे है, जो 12 जनवरी ने सुरु व्हे र 23 जनवरी ने पूरी होवेला। प्रधानमंत्री की अनूठी पहल, 'परीक्षा पे चर्चा' की मकसद परीक्षा रा बारा मांय तनाव ने कम करणो अर परीक्षा ने उछाव मांय बदलणो है। कार्यक्रम रे दौरान, प्रधानमंत्री छात्रां रा सवालां रा जवाब देवे है अर आत्मविश्वास अर सकारात्मक मानसिकता रे साथै परीक्षा देवण सारू व्यावहारिक सुझाव देवे है। शिक्षा मंत्रालय 'परीक्षा पे चर्चा' ने एक बधता जन आंदोलन रा रूप मांय सरावे है।

000

मुख्यमंत्री भजन लाल शर्मा कह्या के राज्य सरकार मिशन ओलम्पिक 2028 माथे काम कर की है। प्रदेश रा पचास प्रतिभाशाली खिलाड़ियां ने ओलम्पिक खेलां मांय भाग लेबा खातर विश्व स्तरीय प्रशिक्षण की सुविधा दी जा की है। वे कह्या के खेलां मांय मोट्यारा ने आगे लाबा खातर खेल नीति लाई जावेला, जिण सूं गांव ढाणी की खेल प्रतिभावां ने आगे आबा की मौको मिल सकेला। मुख्यमंत्री आज उदयपुर जिला रा खेड़ा कानपुर गांव मांय डांगी पटेल समाज की 37 वी खेलकूद होड़ रा समापन समारोह ने सम्बोधित कर रह्या हा। वे कह्या के खेलकूद मांय हार—जीत नी हो र आगे बढ़बा की सीख मिले है।

.....

000

आज पूर्व सैनिक दिवस है। ओ दिन पैली रा सैनिकां रा समर्पण, बलिदान अर निःस्वार्थ सेवा रा सम्मान मांय मनायो जावे है। इण दिन राज्यपाल हरिभाऊ बागडे पैली रा सैनिकों अर वां रा

घरआळां रा त्याग, बलिदान अर राष्ट्र निर्माण खातर वां री कृतज्ञता रो पर्व कह्यो है। वे कह्या के म्हे सगळां राष्ट्र खातर आप रो सब कुछ निछावर करबा वाळां पैली रा सैनिकां अर वां रा घर आळां रा कल्याण खातर काम करता थकां वां री सेवावां रो सम्मान करा। श्री बागडे आज जयपुर मांय सशस्त्र सेना अर पूर्व सैनिक दिवस माथे सेना रा सप्तशक्ति प्रेक्षागृह मांय राख्या कार्यक्रम ने सम्बोधित कर रह्या हा। वे भारतीय सशस्त्र बलां रा पैल्या भारतीय कमांडर-इन-चीफ फील्ड मार्शल के. एम. करियप्पा री सेवावां ने भी याद कर्या। ई मौके राज्यपाल पूर्व सैनिकां, अधिकारियां अर वीरांगनावां ने भी सम्मानित कर्या। वठिने प्रदेश रा केई जिला मांय पूर्व सैनिक दिवस मनायो गया। झुन्झुनू मांय राख्या कार्यक्रम मांय शहीद स्मारक माथे शहीद वेदी परां पुष्पचक्र चढ़ा र शहीदां ने याद कर्यो गयो। ई रे पाछे सूचना केन्द्र सभागार मांय वीरांगनावां, शौर्य पदक विजेतावां अर वयोवृद्ध पूर्व सैनिकां रो सम्मान कर्यो गयो।

000

“कर्मभूमि से मातृभूमि” अभियान रे तैत “जल संचय- जन भागीदारी” मुद्दा माथे एक संवाद कार्यक्रम काले सिंज्यां मुख्यमंत्री रा रहवास माथे राख्यो जायेला। ई कार्यक्रम मांय केंद्रीय जलशक्ति मंत्री सी.आर. पाटिल अर मुख्यमंत्री भजनलाल शर्मा, जयपुर शहर रा 200 कारोबारी, समाजसेवी अर गणमान्य लोगां सूं बात कर ने वां ने प्रदेश ने जल आत्मनिर्भर बणावण री अभिनव पहल सूं जुड़ण खातर प्रेरित करेला। इण सूं पैला काले सिंज्यां सांगानेर मांय होवण वाळां कार्यक्रम मांय बिरखा जल संचयन रा कामां री भूमि पूजन कर सरुआत करी जायेला। ई कार्यक्रम री सरुआत लारला बरस अक्टूबर मीना मांय गुजरात रा सूरत मांय व्ही ही। इण रे पछे ओ अभियान देशभर मांय जल संचयन मांय जनभागीदारी रो प्रेरणास्रोत बणतो जा रह्यो है। “कर्मभूमि से मातृभूमि” अभियान रो मकसद बिरखा रा पाणी ने बचावण खातर प्रदेश मांय पाणी री कमी ने रोकणो है। शुरुआती तौर माथे ई अभियान मांय सिरोही, पाली, जोधपुर, भीलवाड़ा, झुंझुनू अर जयपुर जिलां ने जोड़्यो गयो है।

000

सूर्य रे उत्तरायण होबा माथे मकर संक्रांति रो त्यौहार आर प्रदेशभर मांय पारम्परिक श्रद्धा अर उछाव रे सागे मनायो जा रह्या है। ई मौके लोग पवित्र सरोवरां मांय स्नान कर दान पुण्य कर्या। अजमेर रा पुष्कर, बीकानेर रा कोलायत, जयपुर रा गलता जी अर डूंगरपुर रा बेणेश्वर धाम समेत सगळा तीर्था माथे आज बड़ी संख्या मांय सिरधालू पूग्या। वठिने मलमास रे पूरो होबा माथे आज सूं मांगलिक कामां री सरुआत व्हे री है। मिंदरा मांय भगवान ने तिल रा बण्या व्यंजनां रो भोग लगायो गयो। जैसलमेर मांय सोनार दुर्ग रा लक्ष्मीनाथ मिंदर मांय सुवारे सूं भक्तां री भीड़ लाग्योड़ी है। सवाईमाधोपुर जिला मांय रामेश्वरम् धाम रा त्रिवेणी संगम माथे दिन भर सिरधालू वां री भीड़ निजर आयी। झुन्झुनू अर नागौर मांय आज दिनभर लोग पतंगबाजी करता निजर आया, बठिने मिंदरां मांय दान-पुण्य रो सिलसिलो दिनभर चाल्यो। कोटा अर चूरू मांय भी दिनभर दान-पुण्य रो दौर चल्यो। राजसमंद जिला मांय मकर संक्रांति रो पर्व पारम्परिक उछाव रे सागे मनायो गया। बत्ती जाणकारी म्हाणा खबरनवीस सूं-

.....

अठिने, मकर संक्रांति रे मौके राजधानी जयपुर समेत प्रदेश रा केई जिला मांय पारम्परिक रूप ऊं पतंग उड़ाबा ने ले र लोगां मांय खासो उछाव देख्यो गयो। पतंगबाजी ने ले र लोग सुवारे सूं सिंज्यां ताई छतां माथे निजर आया अर पतंगबाजी रो जमर आनंद लियो। पर्यटन मेहकमां री कानी ऊं जयपुर मांय जलमहल री पाल माथे पतंग उत्सव राख्यो गयो। ई जळसा मांय मुख्यमंत्री भजन लाल शर्मा, उपमुख्यमंत्री दिया कुमारी अर केई जनप्रतिनिधी पतंग उड़ाई। इण रे पछे मुख्यमंत्री सांगानेर री पिंजरापोल गौशाला मांय गौ पूजन कर गायां ने चारो खिलायो। राजधानी जयपुर मांय पतंगबाजी सूं घायल पक्षियां रा ईलाज खातर सगळा पशु चिकित्सा पॉलीक्लिनिक दिनभर खुल्या रह्यां, साथै ही न्यारी-न्यारी सामाजिक संस्थावां पंछियां रा ईलाज खातर शिविर लगाया।

000

प्रदेश मांय सर्दी बढ़ री है। राज्य मांय सब ऊं कम 4 दशमलव 1 डिग्री सेल्सियस कम ऊं कम तापमान सिरोही मांय दर्ज कर्यो गयो। जैसलमेर मांय 4 दशमलव 7, डबोक अर करौली मांय 5 दशमलव 1, चित्तौडगढ़ मांय 5 दशमलव 2, प्रतापगढ़ मांय 5 दशमलव 7 अर राजधानी जयपुर मांय 7 दशमलव 4 डिग्री सेल्सियस कम ऊं कम तापमान दर्ज कर्यो गयो। प्रदेश रा केई हलकां मांय बत्तो घनो कोहरो छायो रह्यो। मौसम केन्द्र जयपुर रे मुजब काल भरतपुर, कोटा अजमेर अर

बीकानेर संभाग मांय कठे—कठे हल्को मेह बरस सके है। 16 जनवरी सूं मौसम सूखो रहबा रे सागे कठे—कठे कोहरो छाये रह सके है। तेज सर्दी अर कोहरा रे चालता राज्य रा केई ज़िला मांय आज कक्षा एक से 8 तांई रा पढानियां खातर छुट्टी राखी गयी।